

COMUNICATO n. 2878 del 12/10/2023

Traduzione in cimbro

Atz Molvén soindase gemacht verte di zboa djar vodar trentinar vorsitzarung von Euregio

Pinn trëff von 28 von herbestmånat vodar 31[^] Djunta von GECT un da 26[^] versåmmelung, boda soin gemacht von istituzionåln vortretar von drai lentar bodase soin gevuntet atz Molvén soindase gemacht verte di zboa djar vorsitzarung von Euregio Tiról, Südtiról un Trentino. Von earst von bimmat, defatte, barta åhevan di vositzarung von Südtiról boda bart vürgan sin 'z djar 2025.

Di istituzionåln trëff soin khent durchgevüart von vorsitzar vodar autonome Provìntz vo Tria un von Euregio darzuar pinn åndarn vorsitzar von zboa lentar: da autonome Provìntz vo Poatzan un Land Tiról. Dar sekretardjo o khint zuargètt, azpe da khütt dar Staütt vodar Euroredjong, in vortretar vodar autonome Provìntz vo Poatzan drinn in djenerål sekretariått von GECT, anvétze bartnda hërta stian drinn in board Euregio di vortretar von Trentino un von Tiról.

Auz pan mòrgas disa auzbèkslom iz khent gemacht pittnan simbolegen gem di slüzzln von Waaghaus, setz von Euregio ka Poatzan, von alt vorsitzar in nåige.

An fintzta atz 28 von herbestmånat soindase asó gemacht verte di zboa djar vodar trentinar vorsitzarung, boda hatt gehatt azpe hauppükt di djungen, gruntn da storege un kulturål identitét un da zivil schütz. Prodjèkte boda soin ågánt daz earst vo allz dar bèlt vodar schual un vodar formatziong un dar stòrdja, stòrdja boda di drai lentar håm pittnåndar gebante vèrt in Andreas Hofer. Daz sèll bodada hatt gehaltet zo khöda dar alt vorsitzar iz ke di progrém vo alln in vorsitzar von Euregio, bodase auzbèksln alln zboa djar, gian hërta nå in gelaichege bege: arbatn pittnåndar übar di konfin, defatte, ditza khint zo haba an groazan vèrt un di pürgar darkhennen lai azma geat vür z'arbatada in di zait. Un no, zo vüara vür nåige prodjèkte aniaglaz lånt mage hërta zeln aftaz sèll boda iz khent getánt pellar. Di sterche vodar mittarbat übar di konfin iz disa: aniaglana bòtta boda bèkslt di vorsitzarung heftma nèt bidar å allz vo nåigom, ma ma geat vür machante nåige sachandarn bodase gruntn afte sèlln sa gemacht vorånahi. Dar alt vorsitzar hatt khött ke sichar dar nåige bart gian vür z'arbata zo macha krescharn un zo vüara in Euregio aftn pest bege.

Dar vorsitzar vodar autonome Provìntz vo Poatzan hatt khött vorgèllz Gott in alt vorsitzar vor di arbat gemacht pittnåndar in dise lestn zboa djar. Pinn spruch "gian übar di konfin" geata vürsnen di mittarbat pittar südtiolar vorsitzarung. 'Z soinda in prgråmm nåige prodjèkte zo nempra di pürgar in Euregio, zo pinta di laüt un apunto zo giana übar di konfin. Vor earst arbatn pittnåndar vor ziln boda gian guat vor alle schaugante zuar dar Europa haltante kunt von laüt boda lem in Euregio. Soin guat auzohaltase saiz vor bazta ågeat 'z lem von laüt saiz vor di ekologesche un ekonomesche problème iz daz earst sachan boma mocht haltn kunt; ditza iz dar Euregio machan auvarkhemmen un vürleng an uantzega vorstèllung vor in gántz storege Tiról: vor in nåige vorsitzar a prodjèkt von laüt nèt vodar politika.

Dar läntshaupmann von Tiról hatt khött vorgèllz Gott in trentinar vorsitzar un alt vorsitzar von Euregio vor da guat arbat gemacht in soine zboa djar vorsitzarung, gedenkhante ke 'z soinda khent getânt sachandarn sa sperimentàrt un ändre anvétze gântz naïge azpe dar Campus Euregio atz Innsbruck, dar konkors vor di schualn gehozt "Euregio fa scuola" un dar EuregioLab boda hatt vürgelekk initziativan zo macha pittnândar in européan Forum vo Alpbach. Arbatn pittnândar nempart di laüt atz poade di сайтn von Prènnar un dar Südtiról asó mage sterchan no mearar soi mittarbat pittar ändarn sait vodar grentze.

Auz pan morgas dar alt vorsitzar hatt gezoaget dar Djunta di arbatn gemacht von Euregio 'z djar 2023. Dena izta khent ågenump dar arbat Progråmm vorz djar 2024. In di lestn zboa djar 2021-2023 dar spruch von Euregio iz gest "dar Euregio iz djung" a spruch boda hatt geböllt soin gemuant ke, in alle di prodjèkte un in di vil initziativan vürgelekk, di djungen soin dar zentrum, sterchrante asó no mearar in Euregio sèlbart un darzuar nemprante no mearar di laüt von drai lentar. Pasarante di vorsitzarung von Trentino in Südtiról dar Euregio bart allz ummaz vürgian auzonemmanen bichtege sfide in di zboa djar boda khemmen: übar dar klimategen umbèkslom, übar daz sèll boda hãm mångl di laüt, aftaz mengln vo spetzializarate arbatar, afta sotziål glaiche, afte gelaichegen oportunitét, zo redjra in balt un di groazan vlaischvrèzzar. Åna hintarzolazza di mittarbat übar dar zivìl schütz, dar kultùr, dar imprenditorì, in turismo un in spòrt.

Dar alt djenerål sekretardjo hatt gedenkht ke disar tage iz nèt lai di ent vonan toal trentinar bege, ma dar ånfång von bege vodar autonome Provìntz vo Poatzan. Dar izzese khött kontént von zboa djar un übarhaup von lestn månat boda hãm gevüart zo macha verte ettlane arbatn. Dar naïge vorsitzarung khintar gelatt a bichtege eredità boda hatt gelatt an Euregio mearar darkhennt un djung. Di mearare sfide boda bartn vürkhemmen bartn soin ågenump legante panândar di ziln von lentar.

'Z hatta gegrüazt di Djunta un di Vorsåmmelung dar pürgemaistar vo Molvén o. in tages auz nå in sea soindase gevuntet di schüalar un di istrutör von pompiarn von distrìkt vo Mezzolombardo boda hãm gezoaget daz sèll bosa soin guat zo tüana, dar tage izzese gemacht verte pinn khindar vodar untarschual "Luigi Nicolussi" vo Molvén von Komprensìf Institut vo Mezzolombardo boda hãm gesunk atz belesch un atz taütsch in "Ode an die Freude" in Ode vodar Européan Uniong zo mercha di tschelle boda pintet di euroredjong sidar azze iz khent augelekk.

Foto un film von Press Åmt.

Übarsetzt von Schaltarle vor di zung von Toalkamou vodar Zimbar Hoachebene

(cdt)